



02. Oktober 2015

UKA 2015/162

Inatsimmut, Kalaallit Nunaanni eqqartuussisaatsimut inatsisip (pinerluttulerinermi il.il. meeqqat inuusuttullu videokkut apersorneqartarnerat) allannguutissaatut siunnersuummut Namminersorlutik Oqartussat oqaaseqaatissaannut Inatsisartut aalajangiiffigisassaattut siunnersuut.

(Pinngortitamut, Avatangiisinut Inatsisinillu Atuutsitsinermut Naalakkersuisoq)

Eqqartuussisarneq pillugu inatsimmi allannguuteqartitsineq, meeqqat inuusuttullu pinerluttuliornermi ilungersunartumik nalaataqarsimasut imaluunniit arlaatigut ilisimannittuulersimasut, pitsaernerusumik, illersorneqartalernerannik sinaakkusersuinissamik Naalakkersuisut siunnersuutaannut Naalakkersuisooqatigiinniit ima oqaaseqaateqassaagut:

Meeqqanik sutigut tamatigut illersuineq inuiaqatigiit suliassaraat pingaaruteqartoq.

Meeqqat inersimasunut sanilliullugit sunnerneqarsinnaanerit annertunerusarpoq, ingammik sakkortuumik misigisaqarsimatillutik sunnerneqarsinnaasarnerat ajornannginnerulersarpoq. Taamaammat meeqqat illersorumallugit suliniutit assigiinngitsut atorlugit inuiaqatigiit ataavartumik aaqqiissuteqartassallutik iliuuseqartarnissaq pisussaaffigaat.

Inatsisip atuutsileqqaatissaani Inatsisartuni eqqartorneqarmat (UPA2014) ilaatigut Siumumiit piimasaqaatigisimavarput, video atorlugu meeqqanik apersuinissamut ukiunut killissaliussaq, 12-inik ukiulinniit 15-inik ukiulinnut, qaffanneqartariaqartoq, soorluttaaq Atassutikkut Demokraatillu siunnersuut ataatsimiititaliamut susassaartumut ingerlateqqikkaat pineqartut piffissami eqqarsaatigalugit. Video atorlugu apersuineq assersuutigalugu kinguaassiuutitigut pinerluttuliornerit, qanigivallaakkamik atoqateqarnerit aamma persuttaanerit ilaqtariit iluanni pisut pillugit suliani pisussaq atuutsinneqalissooq, tamannalu Naalakkersuisusooqatigiit iluarisimaarpaat aammalu meeqqanik illersuinerusoq oqaatigissavarput.

Naggataatigut oqaatigerusunnarpoq Naalakkersuisooqatigiit pingaartilluinnarmassuk inuiaat inatsisitigut illersugaanerisa qulakkeersimajuarnissaat. Taamaattumik Naalakkersuisooqatigiit eqqartuusiveqarnerup pitsanngorsarneranut suleqataajuarnissaa matumuuna aamma naqissuserlugu oqaatigissavarput.

Naalakkersuisooqatigiinniit taamatut oqaaseqarluta siunnersuut aappassaaneerseqartinnagu Inatsisunut Ataatsimiititaliami suliarineqarnissaa inassutigaarput.

Anders Olsen

Siumut